



2012-2013 IKASTURTEAN ITUNPEKO IKASTETXEETAN IKASLEAK ONARTZEKO ARAUAK.

1.- Arautegia

Ikasleak onartzeko, xedapen hauek izango dira kontuan:

- 35/2008 Dekretua, martxoaren 4koa.
- Hezkuntza, Unibertsitate eta Ikerketako sailburuaren 2011eko abenduaren 20ko Agindua, 2012-2013 ikasturtean Haur, Lehen eta Derrigorrezko Bigarren Hezkuntzako ikastetxe publikoetan eta itunpeko ikastetxeetan matrikulatzeko prozedura eta egutegia arautzen dituen.

2.- Aplikazio-eremua

Ikasleak onartzeko prozesu honetan, eskaera egin beharko dute 2 urteko gela batean onartuak izan nahi duten ikasle guztiek, baita Haur Hezkuntzako bigarren zikloko, Lehen Hezkuntzako eta Derrigorrezko Bigarren Hezkuntzako edozein kurtsoan ikastetxera lehen aldiz sartu nahi dutenek ere.

Bermatu egingo da etapa eta maila desberdinetan ikasleek ikastetxe berean ikasten jarraitu ahal izango dutela eta, ondorioz, ez da onartzeko eskaerarik egin beharko, 2 urteko gela batera sartzeko izan ezik. Horretarako, ikasleak maila eta etapa batetik bestera pasatu ahal izateko, ikastetxeek eskaintza planifikatuko dute, itunpeko gelen kopurua kontuan izanik.

Ikastetxeko ikasleren batek 2012-2013 ikasturtean hizkuntza-eredua aldatu nahi badu, ikasleak onartzeko epean eskatu beharko du ikastetxean bertan aldatzeko, eta ikastetxetik kanpoko ikasleek bete beharreko baldintza berak bete beharko ditu.

3.- Hezkuntzako eskaintza

Zehazteko ikastetxe bakoitzak zenbat talde eta ikasle matrikulatu ahal dituen, gehienez ere, maila eta hizkuntza-eredu bakoitzean, kontuan hartuko dira ikasketak eta eskola-plazak onartzeko aginduak eta hezkuntza-itunak. Ikastetxe pribatuetan, 2 urteko ikasleak 3 urteko geletan sartzera bermatzeko, ikasleak onartzeko prozesu honetan parte hartu beharko dute; horrez gain, matrikulatutako ikasleak, guztira, ez dira izango ikastetxe horretarako agindu honetan arautzen den prozesuaren hasieran 3 urteko geletarako onartu daitezkeen plazak baino gehiago.

Ikastetxeek eskabide guztiak onartu beharko dituzte. Eskabidean lehen aukera moduan azaltzen bada ikastetxeak eskaintzen ez duen hizkuntza-eredu bat, familiei jakinaraziko zaie aukeratutako eredua ez dagoela ikastetxean eta lurralde-ordezkaritzari jakinaraziko zaiola, hark azter dezan eredu eta maila horretako talderik eraterik dagoen ikastetxean bertan ala zonaldean; dena den, horretarako, nahikoa eskabide egon behar dira eta plangintzak horretarako bidea eman behar du. Edonola ere, kasu horretan, ikasleak onartzeko prozesuan parte hartuko du eskatzaileak, baina ikastetxeak gainerako ereduak plazak esleitzeko duen prozesuan, prozesu horretan parte hartzeko eskatu badu.



4.- Ikastelak onartzea bermatzeko batzordeak.

Ikastetxe publikoen eta itunpeko ikastetxeen eragin-eremuak eta mugakideak zehazteko asmoz, ikasleak onartzea bermatzeko egungo batzordeek jarraitu egingo dute beren egitekoak betetzen irailaren 14a arte; izan ere, orduan berrituko dira, eta ikastetxeei sasoiz jakinaraziko zaie, aginduak ezarritako epeetan barematu ahal izan ditzaten eskaerak.

5.-Gehienezko ratioak

Hona 2012-2013 ikasturterako ezarritako gehienezko ratioak:

a) adin bereko ikasle-taldeak:

Haur Hezkuntza:.....(2 urte) 18 ikasle
Haur Hezkuntza:.....(3-5 urte) 25 ikasle
Lehen Hezkuntza:..... 25 ikasle
Derrigorrezko Bigarren Hezkuntza: 30 ikasle

Arestian adierazitakoak baino ikasle-ratio handiagoak onartuko dira, ikastetxeak matrikulatuta dauden ikasleak errepikatzeko aukera izan dezaten.

6.- Matrikulak egiteko prozedura

6.1.- Argibideak

Ikastetxeek alderdi hauei buruzko informazioa emango diete eskatzaileei:

- Aurkeztu behar dituzten egiaztagiria, baremoaren atal desberdinak balora diezazkieten.
- Ikaslearen ibilbidea, ikastetxe horretan lehen aldiz matrikulatzen denetik unibertsitateaz kanpoko araututako irakaskuntzaren etapak bukatu arte.
- Informazio hori idatziz emango zaie eskatzen duten guztiei.

Era berean, informazio hau jarri beharko da iragarki-taulan:

- a) Ikasleak ikastetxe publiko eta pribatu itunduetan onartzeko araudia.
- b) Ikastetxearen eragin-eremua eta eremu horren mugak.
- c) Eskabideak egiteko epea.
- d) Prozesuaren egutegia, onartu eta kanpoan utzitako ikasleen zerrendak argitaratzeko eguna eta erreklamazioak egiteko epeak.
- e) Puntuak zehazteko Eskola Kontseiluak edo Ordezkaritza Organo Gorenak emandako irizpideak iragarki-taulan jarriko dira, eta jarri ere eskabideak aurkezteko epea hasi baino lehenago Hezkuntzako lurralde-ordezkaritzak irizpideok jakinarazteko bidaltzen duen idazkiaren kopia jarriko da.
- f) Eskabideak aurkezteko epean ikastetxeko idazkaritzak jendeari erantzuteko duen egutegia eta ordutegia.



- g) Informazio-agiria, Hezkuntza, Unibertsitate eta Ikerketa Sailak prestatutakoa, ikasleak onartzeko prozesuan gehien egiten diren galderei erantzuteko erabiltzen dena.

6.2.-Ikasleak onartzeko epea eta aurkeztu beharreko dokumentazioa.

Eskabideak onartzeko epea 2012ko urtarrilaren 30etik otsailaren 10 arte (egun biok barne) luzatuko da.

Eskaera guztiek ondorengo dokumentazioa izan beharko dute, derrigorrean:

- Ikaslearen eta haren gurasoen edo tutorearen familia-liburuko orrien fotokopiak.
- Udalak emandako erroldatze-egiaztagiria.
- Ikaslearen aitaren, amaren edo legezko tutorearen NANaren (AIZrena atzerritarren kasuan) kopia.
- Hezkuntza-premia bereziei buruzko galdetegia, beharrezko denean.

6.3.- Eskabideak izapidetzea

Eskabide bakarra egin, eta ikastetxe batean aurkeztu beharko da, eta interesdunak berak bete ahal izango du, bide hauetakoren bat erabiliz:

- On line, otsailaren 9 arte (egun hori barne), Hezkuntza, Unibertsitate eta Ikerketa Sailak horretarako prestatzen duen aplikazio informatikoaren bidez. Gero, eskabideak izapidetzen dituenean, datuak egiaztatuko ditu ikastetxeak, eta, zuzendu behar baditu, zuzendu egingo ditu.
- Aukeratutako lehenengo ikastetxeko idazkaritzan. Bertako norbaitek sartuko ditu eskatzaileek eskabidean jarritako datuak.

Eskabideko datuak aplikazioan kargatu eta dokumentazioa egiaztatu eta gero, eskatzaileari datu-orria erakutsiko zaio; bertan jasoko dira: datu pertsonalak, egindako eskaera, barematzeko alegatutako egoerak eta aurkeztutako agirien zerrenda. Dokumentu hori emateko, aurreko atalean adierazitako agiri guztiak aurkeztu beharko ditu eskatzaileak.

Eskatzaileak datuok aztertu, eta zuzentzat jotzen baditu, datu-orria sinatuko du. Ikastetxeak zigilua jarriko dio datu-orri sinatuari, eta aurretiaz sartu dituen datuak baliozkotuko ditu. Egindako eskaeren ordezkagiri eta ziurtagiritzat joko da datu-orri hori, sinatu eta zigilatu ostean.

Era berean, matrikulen aplikazio informatikoak 1etik 999999a arteko zenbaki bana jarriko die datu-orri guztiei. Zenbaki hori erabiliko da egon litezkeen berdinketak hausteko, betiere berdinketak hausteko gainerako irizpide guztiak aplikatuta ere bere horretan badirau. Kasu horretan, aplikazio informatikoak eskabide guztiak txikienetik nagusienera ordenatuko ditu, eta txikienari emango dio lehentasuna.

Azkenik, aplikazioan sartutako datu guztiei oniritzia eman beharko die ikastetxeak otsailaren 15eko 14:00ak baino lehenago.

Aplikaziotik zuzenean aterako dira prozesuko zerrenda guztiak.



6.4.- Datuak aldatzea eta uko egitea.

Otsailaren 10 izango da eskabidean jasotako datuak aldatu edo zuzentzeko azken eguna. Horretarako, ikastetxeak sinatu eta zigilua eman zuen datu-orria aurkeztu beharko da.

Martxoaren 21a arte eskabideari uko egin ahal izango zaio. Horretarako, eskatzaileak uko egiteko idazkia aurkeztu beharko du eskabidea entregatu zuen ikastetxe berean. Uko eginez gero, eskabidean jasotako aukera guztiei uko egingo zaie. Azkenik, ikastetxeak idazki hori artxibatuko du, bere egunean aurkeztutako eskabidearekin batera.

6.5.- Eskatzaileen zerrenda:

Eskaerak aurkezteko epea bukatu eta matrikula-datuak ontzat eman ostean, otsailaren 16an, ikastetxeko iragarki -taulan argitaratuko da kurso guztietako eskatzaileen zerrenda, ikasle guztien izen-abizenekin eta eskatutako hizkuntza-ereduekin.

6.6.- Barematzea:

Ez da eskaerarik barematuko eta eskatzaile guztiak onartu egingo dira, baldin eta eskatutako plazak eskainitakoak beste edo gutxiago badira.

Eskaerak barematu behar dituzten ikastetxeetan, aplikazio informatikoak puntuazio-hurrenkeraren arabera ordenatuko ditu eskabideak, kontuan hartuta zerrendako ordena eta hizkuntzei jarritako lehentasuna.

Ratioaz gainera inoiz ezin izango da ikaslerik hartu, nahiz eta neba-arrebak, bikiak, hirukiak eta abar izan.

Eskaerak barematzeko, OOGk edo Eskola Kontseiluak irizpide hauek erabiliko ditu:

a) Helbidearen hurbiltasuna (gehienez ere, 5 puntu)

Kode Zibilaren arabera (154. artikulua, 40. artikuluari begira), gurasoek guraso-agintea galtzen duten kasuetan izan ezik (behar bezala egiaztatua), ondorengoetako bat izan beharko du, legez, emantzipatu gabe dauden adin txikikoen seme-alaben helbidea:

1. Guraso-agintea duten gurasoetako edozeinena.
2. Epaileak zaintza eman dion aitarena edo amarena, bereizketa, dibortzio edo ezkontza-baliogabetasunaren kasuetan.
3. Legez guraso-agintea duen tutorearena.

Odol-kidetasuna gorabehera, eskolatzeko ez da aintzakotzat hartuko beste senide batzuen helbidea.

Hona helbidearen puntuazioa: 5 puntu, bizilekua ikastetxearen eragin-eremuan badago; 2 puntu, mugakidea bada, eta puntu 1, eskatzailearen familiaren helbidea ikastetxea dagoen udalerrian kokatuta baldin badago. Puntu horiek ez dira metatuko.

Erroldatze-ziurtagiria aurkeztu beharrean helbidea eragin-eremuan duen aitaren/amaren/legezko tutorearen enpresaren ziurtagiria aurkezten bada, enpresaren helbideari dagokion puntuazioa (2 puntu) emango da. Helbide hori familia-helbidearen alternatiboa da eta, ondorioz, ezin da puntuazioa metatu.



b) Errenta eta adin txikiko anaia-arrebak (3 puntu gehienez).

Familia-unitatearen diru-sarreraren mailagatik ematen den puntuazioa eskuratu ahal izateko, Foru Ogasunari zerga-datuak eskatzeko baimena izenpetu beharko zaio Sailari. Ikastetxekoa ez den lurralde historiko batean bizi diren pertsonak aurkeztu beharko dute errenta-aitorpenaren fotokopia, ez beste inork.

Errentaren atalean puntuatzeko eskubidea izateko, diru-sarrera konputagarriak izango dira familia-unitateko kide guztiek 2010eko zerga-ekitaldian izandako zerga-oinarri orokorrari dagozkionak

Datuak egiaztatu, eta emaitzak jaso arte, kontuan hartuko dira egiaztatze baimena eman duten lagunen puntuazioak. Dena den, datuak egiaztatu eta gero, aldatu ahal izango dira, onartu eta baztertutakoen zerrendak prestatzeko.

Datuak egiaztatu eta horien emaitzak jaso eta gero, eta errenta baloratzeko, Ogasunak egiaztatutakoak emango dira ontzat.

Egiaztapenen emaitzak behin-behineko zerrendak argitaratu eta gero jasotzen badira, ikastetxeak egoera hori hartu beharko du kontuan, behin betiko zerrendak egiteko. Egiaztapenen emaitzak onartutakoen behin betiko zerrendak argitaratu ondoren jasoko balira, ikastetxeak horren berri eman behako diio Ordezkaritzari.

Edonola ere, diru-sarrerak zein diren alde batera utzita, 0,25 puntu emango dira eskatzailearen adin txikiko anaiako/arrebako eta bakoitzaren familia-liburuaren fotokopia aurkeztu beharko da.

c) Ikastetxean edo atxikitako ikastetxeetan dauden senideak (9 puntu gehienez)

9 puntu emango dira ikastetxean edo atxikitako ikastetxeetan anaia/arreba bat izateagatik. Atxikitako ikastetxeen kasuan, ikastetxearen ziurtagiria aurkeztu beharko da, familia-liburuaren kopiarekin batera. Horretarako, sare publikoan, Hezkuntzako lurralde-ordezkariek emandako ebazpenetan ezarritako atxikipenak aplikatuko dira, martxoaren 4ko 35/2008 Dekretuan 6 artikuluan xedatutakoa ezarri, eta, halakorik ez badago, urtarrilaren 30eko 26/1996 Dekretuko V. eranskinean ezarritako hezkuntza-ibilbideak aplikatuko dira.

Aitak, amak edo tutoreak eskatutako ikastetxean lan egiten badu, 7 puntu emango dira.

d) Bestelako egoerak (6,5 puntu gehienez)

- 2 puntu emango dira ikaslearen elbarritasunarengatik eta puntu 1 haren aita, amaren, tutorearen, edo anaiaren/arrebaren elbarritasunarengatik, hura behar bezala egiaztatuz gero. Egoera hori ezin zaio familiako kide bati baino gehiagori zabaldu.
- Kategoria bereziko familia ugariko: 1,5 puntu; kategoria orokorreko familia ugariko: puntu 1.
- Ikastetxeko OOGk libreki zehaztutako beste egoera objektibo batzuegatik: 2 puntu. Gorabeh **Gorabehera horiek argitaratu egin beharko dira. Horretarako, eskaerak aurkezteko epea hasi aurretik Lurralde Ordezkaritzara bidalitako idazkiaren kopiatu jarri beharko da ikastetxeko iragarki-taulan.**



Eskaerarekin batera entregatu beharko da baremoaren atalak egiaztatzeko dokumentazio guztia eta eskaerak onartzeko epea itxi ondoren ezin izango da agiri gehiagorik onartu.

Baremoaren atalen bat egiaztatzeko dokumentazioa ez ekartzeak esan nahi du atal horren puntuazioari uko egiten zaiola.

7.- Onartutakoen eta kanpoan utzitakoen behin-behineko zerrendak.

Onartutako eta kanpoan utzitako ikasleen behin-behineko zerrendak martxoaren 9an argitaratuko dira ikastetxean. Bikoiztutako eskabideak azkenengoz izapidetuko dira, hau da, epe barruan aurkeztutako gainerako eskabideei plazak esleitu eta gero.

Eskaerak ez badira barematu behar, onartutako behin-behineko zerrendak kurtsoka eta ereduka agertuko dira, eta ikasleen datu pertsonalak bakarrik jasoko dira: ikaslearen izen-deiturak, alfabetikoki ordenatuta.

Eskaerak barematu behar badira, ikasle bakoitzak guztira lortutako puntuazioaren arabera ordenatu beharko dira onartutako eta kanpoan utzitako ikasleen zerrendak, mailaka eta ereduka berezita. Zerrenda horietan agertu beharko dute, ikasleen datu pertsonalak (izen-deiturak), baremoaren atal guztietan lortutako puntuazioak eta guztira lortutakoak.

Ikastetxeko OOGri edo Eskola Kontseiluari martxoaren 21a arte aurkeztu beharko zaizkio onartutako eta kanpoan utzitako ikasleen behin-behineko zerrenden kontrako erreklamazioak. Erreklamazio horiek ikastetxeko OOGk edo Eskola Kontseiluak ebatzi beharko ditu, eta onartzen badira, programako datuak aldatu egin beharko dira.

8.- Behin betiko zerrendak

Behin-behineko zerrendei aurkeztutako erreklamazioak ebatzi eta programako datuak aldatu ostean, martxoaren 28an argitaratu beharko dira ikastetxean onartutako eta kanpoan utzitako ikasleen behin betiko zerrendak.

9.- Bigarren eta hirugarren aukerak.

Lehengo aukeratzat jarritakoa lortu ez duten ikasleei bigarren eta hirugarren aukerak esleitu dizkie aplikazio informatikoak. Aplikazio horren bitartez, lehengo aukera moduan hautatutako ikastetxeak eta esleitutako ikastetxeak jasoko dituzte zerrenda horiek, eta ikastetxe bietan argitaratuko dira martxoaren 30ean.

10.- Prozesua amaitzea

Azkenean, libre geratzen diren plazak eskaini ahal izango dizkie Lurralde Ordezkaritzak ikasleei, baldin eta eskatutako ikastetxeetan plaza lortu ez badute.

Behin betiko zerrenden kontra, gorako errekurtsua jarri ahal izango zaio lurralde-ordezkaritari apirilaren 30a arte.

Epearen barruan aurkeztutako eskaera guztiei plaza eman ondoren hartuko dira kontuan epez kanpo aurkeztutako eskaerak.



11.- Erlijioa.

Indarrean den legeriak xedatutakoaren arabera, ikastetxeek derrigorrean eskaini beharko dute Erlijioa irakasgaia eta aukerakoa izango da ikasleentzat.

Ikasleen gurasoek edo tutoreek ikastetxeko zuzendariari jakinaraziko diote ikasleak Erlijioa ikastea nahi dutela eta zein erlijio nahi duten, eta jakinarazi ere hezkuntza-etapa edo maila bakoitzaren hasieran edo ikasleak ikastetxean lehen aldiz izena ematen duenean jakinaraziko diote.

Arau hauek jasotzen ez duten edozein alderditarako, 1. puntuan ezarritako araudiaren arabera jokatu da.

Begirunez,

Vitoria-Gasteiz, 2012ko urtarrilaren 18a.

Marcelino Hernández Garduño
IKASTETXEEN ZUZENDARIA